

**Bosna i Hercegovina
FEDERACIJA BOSNE I HERCEGOVINE
AGENCIJA ZA NADZOR OSIGURANJA
FEDERACIJE BOSNE I HERCEGOVINE
S A R A J E V O**

Službene novine Federacije BiH, broj 81/06

Na osnovu čl. 8., 10. i 66. Zakona o društvima za osiguranje u privatnom osiguranju («Službene novine Federacije BiH», broj 24/05) i člana 16. Statuta Agencije za nadzor osiguranja Federacije Bosne i Hercegovine, Stručni savjet Agencije za nadzor osiguranja Federacije Bosne i Hercegovine, donosi

**ODLUKU
O OSIGURANJU TROŠKOVA PRAVNE ZAŠTITE I OSIGURANJU POMOĆI**

I OPĆE ODREDBE

Član 1.

Ovom Odlukom reguliraju se posebne odredbe za vrste osiguranja: osiguranje troškova pravne zaštite – vrsta 17. i osiguranje pomoći – vrsta 18.

II PRAVNA ZAŠTITA

Član 2.

Osiguranje troškova pravne zaštite sastoji se u ugovaranju obaveze pokrivanja troškova sudskog postupka i pružanja ostalih usluga koje su neposredno povezane s pokrićem osiguranja, između osiguravatelja i osiguranika, uz plaćanje određene premije, i to:

1. osiguranja naknade za gubitak, štetu ili povredu koju trpi osiguranik u vansudskom, građanskom ili kaznenom postupku,
2. obrane ili zastupanja osiguranika u građanskom, kaznenom, upravnom ili drugom postupku ili u pogledu bilo kojih potraživanja od osiguranika.

Član 3.

Osiguranje troškova pravne zaštite iz člana 2. ove Odluke može biti:

1. predmet odvojenog ugovora od ugovora sačinjenih za ostale vrste osiguranja ili
2. odvojeni dio na polisi osiguranja, u kojem su navedeni priroda pokrića pravnih troškova i iznos premije.

Član 4.

Ugovor o osiguranju troškova pravne zaštite mora uključivati pravo osiguranika da slobodno bira svog advokata:

1. da ga brani ili zastupa ili opslužuje njegove interese u bilo kojem sudskom ili upravnom postupku;
2. da brani njegove interese svaki put kada se pojavi sukob interesa.

Član 5.

U slučaju spora kada su obje ili više strana sudionica, osigurani kod istog osiguratelja po ugovoru o osiguranju pravne zaštite, pravno savjetovanje i zastupanje svake od strana u sporu vodi neovisan advokat.

Član 6.

U slučaju spora između osiguravatelja pravnih troškova i osiguranika u vezi sa potrebom zaštite zakonskih interesa osiguranika pred sudskim ili upravnim organima, osiguranik može zatražiti savjet advokata po svom izboru, u vezi sa potrebnom zaštitom. Ukoliko osiguranik ne prihvati taj savjet ili ako društvo za osiguranje smatra da osiguranik nema odgovarajuću zakonsku i materijalnu osnovu za osigurani slučaj, predmet se rješava u skladu sa Zakonom o društvima za osiguranje u privatnom osiguranju.

Sve troškove iz stava 1. ovog člana snosi osiguravatelj pod uslovom da se poduzete radnje smatraju neophodnim za zaštitu interesa osiguranika, u suprotnom nastale troškove podjednako snose osiguravatelj i osiguranik.

Osiguravatelj troškova pravne zaštite je obavezan obavijestiti osiguranika o pravima koja proizlaze iz stava 1. ovog člana kad god se pojavi sukob interesa ili spor.

Član 7.

Društvo za osiguranje koje obavlja osiguranje iz člana 2. ove Odluke u cilju spriječavanja sukoba interesa, mora osigurati da nijedan djelatnik koji je povezan sa rješavanjem zahtjeva za naknadu pravnih troškova, ili sa pravnim savjetima vezanim za te zahtjeve, ne obavlja istovremeno slične poslove u društvu za osiguranje, ako društvo za osiguranje obavlja više vrsta osiguranja.

III POMOĆ

Član 8.

Osiguranje pomoći uključuje pomoć osobama koje se nađu u poteškoćama za vrijeme putovanja, dok su izvan kuće ili dok su izvan mjesta stalnog boravka.

Pomoć iz stava 1. ovog člana sastoji se u ugovaranju obaveze društva za osiguranje da korisniku u najkraćem roku stavi na raspolaganje pomoć kad god dospije u poteškoće koje nastanu nakon ostvarenja osiguranog slučaja, u slučajevima i pod uslovima koji su određeni ugovorom o osiguranju, uz plaćanje određene premije.

Član 9.

Pomoć iz člana 8. ove Odluke može se pružiti u novčanom ili u naturalnom obliku.

Pružanje pomoći u naturalnom obliku iz stava 1. ovog člana može se obavljati uz pomoć lica i/ili opreme lica koje ih pruža.

Član 10.

Pomoć iz člana 8. ove Odluke ne uključuje usluge održavanja niti usluge kupcima nakon prodaje.

IV ZAVRŠNE ODREDBE

Član 11.

Ova Odluka stupa na snagu osmog dana od dana objave u „Službenim novinama Federacije BiH“ .

PREDSJEDNIK STRUČNOG SAVJETA
mr. Zaim Hećo, v.r.

Broj: 1.0.-021-625-2/06
Sarajevo, 20.12.2006. godine